



IRASTORTZA AGIRREZABALA familia

GOIZ EGUZKI kale-etxea da, kanposanturako bidean dagoena.

Aitaren aldetik, Frantzisko Irastortza aitona, eta Madalena Irastortza amona, 1906an ezkondu ziren. Frantzisko Irastortza *Txamarretxekoa* zen. Bost seme-alaba izan zituzten: Antonio, Terexa, Anizeto, Maria eta Euxebi.

Amaren aldetik, Tomaxa Etxeberria amona, Gaintzako *Zabale* baserritik etorria zen. Aita perratzaila zuen eta Zaldibin lan asko egiten zuena, *Aztian*. Bertako nagusiari baimena eskatu omen zion familia Gaintzatik ekartzeko, ea borda handitu zezakeen. Baiezkoa eman ondoren *Aztia* ondoko *Goiko Ermentari* egin omen zuten. Tomaxa zazpi urte zituela etorri zen Zaldibira eta gero ezkondu eta *Fabrika* izeneko etxean bizi izan zen.

Frantziskok eta Madalenak, aitona-amonek, artaldea zuten, eta artzaintzatik ateratzen zuten bizimodu. Frantzisko aitona suak erreta hil zen mendian. Antonio semea ere ezkondu arte ibili zen artzain. Maiatzean igotzen ziren *Oidura*, eta, Antonio semea txikia zela, baita *Arrantsaora* ere. Bertara igotzeko bi ordu eta erdiko bidea zuten. Gazta egiten zuten, eta Ordiziako feriara astoan ekartzen zuten.

Antonio Irastortza Robustiana Agirrezabalarekin ezkondu zen 1950ean Arantzazun eta bertan pasa zuten astea. Antonio eta Robustiana edadean aurreratuak ezkondu ziren eta Robustiana haurdun geratu zenean, pozaren pozez erabaki zuten artzaintza utzi eta etxea eraikitzea: *Goiz Eguzki* izenekoa. Aita Ber-

nedo lantegian, Beasainen, ari zen lanean. Ofizio asko ezagutzen zituen gizona izan, eta arotz eta haragin lanean berak esku hartuz, *Biandako* Lontxok igel-tseritzan lagunduta altxatu zuten *Goiz Eguzki*.

Robustiana jostuna zen, Ordizian ikasia eta lan asko egin Ordizian bertan, eta ezkondu arte *Fabrika*n bizi izan zen. Umetan *Zubiaurrera* joaten omen zen eskolara. Ezkondu zirenean *Beheko Ermentarin*, *Madalenan*, jarri ziren bizitzen, etxe berria, *Goiz Eguzki*, egin arte.

Hiru alaba izan zituzten: Maria Pilar, Mari Karmen eta Nekane.

Informazio emaila: Nekane Irastortza



Madalena Irastortza
(aitaren aldeko amona).



Frantzisko Irastortza
(aitaren aldeko aitona).



Tomaxa Etxeberria
(amaren aldeko amona).



Antonio Irastortza (aita), Robustiana Agirrezabala (ama) /
Maria Pilar, Mari Karmen eta Nekane.



Robustiana (ama), Maria Pilar / Nekane eta Mari Karmen.